

Texts principals

TISSI mangiar po esser privlus

Cun in bel mail cotschen ha la nauscha madrastra tissientà Alvetta.
Il tissi è malign e terribel, perquai ch'el agescha en il zuppà.
In med ideal per assassinar!

En la natira datti ina gronda quantidad da plantas e da bulieus da tissi.
Per noss perdavants eri existenzial da savair distinguer quai ch'ins po mangiar da quai ch'è da tissi.
Ma er quai ch'ins po mangiar daventa privlus, sch'i va a mal.

En temps da frestgera, da conservas e da controllas da victualias n'han ins strusch pli tema da tissientadas acutas.
Ma la discussiun davart victualias privlusas n'ha betg chalà.
Bleras persunas sa fan quitads pervia da las consequenzas dals aditivs, dals pesticides e dals tissis per l'ambient.

Visitai ils quatter lieus dals delicts ed examinai Vossas enconuschientschas davart tissis.
Savais Vus schliar las quatter tissientadas?

0.0 La quantidad decida...

Gia il medi Paracelsus (1493 – 1541) saveva:
mintga victualia – ch'ella saja anc uschè usitada – è da tissi, sch'ins mangia memia bler.
Il pli savens dovri dentant grondas quantitads per effectivamain far donn.
Cunter talas surdosas reagescha noss corp ultra da quai cun ina revolta natirala.

Sco ch'ils exempels qua mussan, datti tuttina adina puspè "accidents" cun tissientadas extremas e cun effects mortals.
Ils motivs per il consum smesirà èn recumandaziuns dubiusas a favur da la sanadad, il regi d'ina tscherta substanza, cumprovas da curaschi ubain receipts cun faussas indicaziuns davart las ingredienzas.
E tar tschertas victualias vuli mo fitg pauc per surpassar la dosa sauna.

1.0 Lieu dal delict: la natira

Mangiabel u da tissi?

La natira metta a disposiziun victualias, medischina e tissis.
Nus duvrain ina gronda savida per identifitgar quests stgazis da la natira e per als applitgar correctamain.
Cuschinar cun plantas selvadias e cun bulieus ch'ins ha rimnà sez è modern.
Ils amaters da la natira sa cumpran cudeschs davart quai ch'è mangiabel en la natira e sa mettan en viadi per rimnar spaisas gustusas – betg da rar cun consequenzas fatalas.

Tar tschertas plantas e tar tscherts bulieus sa sumeglian ils represchentants mangiabels e quels da tissi uschè ferm, ch'ina illustraziun en in cudesch na tanscha betg per als distinguer cleramain in da l'auter.

Per ils bulieus datti la controlla da bulieus.
Per las plantas dependain nus da nus sezs ubain da spezialists da noss conturns.
Examinai Vossas enconuschientschas!

Tar intginas staziuns è pront insatge da mangiar per Vos.
Savurai ed empruvai senza tema – tut è saun!

2.0 Lieu dal delict: la cuschina

En cuschina spetga il privel

Ir enturn cun victualias frestgas è delicat. Cun preparar, cun conservar u cun dosar spaisas pon capitar sbagls. Gia noss perdavants temejan las consequenzas d'ina tissientada da victualias. Per quest motiv dovran ils umans dapi millennis differentas proceduras per tegnair en salv victualias. La conservaziun cun sal, cun ieli, cun aschieu e cun mel è enconuschenta gia da vegl enna.

Nus ans laschain gustar nossas spaisas prest adina senza quitads. Prescripziuns e controllas severas tras las autoritads fan ch'il consum da nossas victualias è segir. Ma nus avain perdi la survista da la glista da las ingredienzas da las victualias che vegnan preparadas industrialmain. Mintga scandal da victualias fa perder la confidenza en la segirezza da nossa vivonda. Las discussiuns davart ils aditivs, davart ils tissis per l'ambient e davart las restanzas da pesticids chaschunan ulteriura malsegirtad.

3.0 Lieu dal delict: il mulin

Il paun mortal

Avant l'onn 1750, cur ch'il tartuffel è arrivà sin maisa, vivevan ils umans da buglia da graun e da paun. Gist quest nutriment innocent da mintgadi ha chaschunà en il decurs dals tschientaners innumbraivlas victimas.

I capitava adina puspè ch'il graun e la farina eran tschuffergnads cun bulieus u cun sems da plantas. Tgi che na mureva betg da la tissientada, daventava per il pli grevamain malsaun u stueva vegnir a frida cun in sistem d'immunitad pli flaivel.

Bulieus destrueschan anc oz en l'entir mund ina part considerabla da la racolta annuala. Ils mulins procuran – cun maschinas adequatas – che grauns infestads, sems e bulieus da tissi vegnan sortids.

4.0 Lieu dal delict: la biblioteca

In'arma terribla

Il tissi è savens in privel invisibel. Substanzas senza savur han laschè daventar inquala spaisa l'ultim past – fin oz. L'onn 2004 ha dà en egl l'attentat da tissi sin il candidat per il presidi da l'Ucraina, Viktor Juschtschenko. Cun sagiaders preliminar ubain cun rituals empruvavan ins antruras da guntgir il tissi. Als assassins da tissi dad oz vegni difficultà d'exequir lur acziun tras metodos d'analisa modernas. Ils fastizs da tissi ils pli minimals èn renconuschibels e tradeschan l'assassin. En il fratemp èsi fitg grev da cumprar substanzas da tissi fitg fermas. Mesiras da precauziun, sco p.ex. colurar il tissi cunter ratuns, augmentan ultra da quai la segirezza cun ir enturn cun tissis.

L'assassin da tissi è fitg derasà er en la litteratura criminala. Agatha Christie, Friedrich Schiller e schizunt Astrid Lindgren, els tuts èn sa servids da l'arma tissi. En ils romans èn savens las dunnas quellas che vulan eliminar lur victimas en moda nunsanguinusa.